

Maltrato?

Hopi “eksperto” ta para riba ku mayornan nunca mester suta un yu. Nan ta afirmá ku sota ta hasi daño sikológiko enorme na e mucha. Pa nan, sutamentu ta maltrato. Asta na algun pais nan a logra hasi sutamentu un akto kriminal kastigabel pa lei

Ma e ekspertonan ta malamente kiboká. Un motibu tantu mucha awendia ta kometé aktonan kriminal ta **pasobra nan NO a haña disciplina na kas**. E Eksperto Supremo, nos Kreador, ta bisa bon kla ku **yunan tin mester di sota ora nan desobedesé nan mayornan**. *“No keda sin duna un mucha disciplina; maske bo sut’é ku bara, e lo no muri. **Sut’e ku bara, i libra su alma...** Lokura ta mará den kurason di un mucha; bara di korekshon lo alehá esaki for di dje. Bara di reprimendementu ta duna sabiduria, ma un yu lagá pa su kuenta ta pone su mama na bèrguensa”* (Proverbionan 23:13-14; 22:15; 29:15). E ekspertonan ta bisa ku mayornan ta demonstrá odio ora nan suta nan yu. En kontraste, Dios ta bisa **“Esun ku laga di uza bara ta odia su yu, ma esun ku ta stim’é ta disciplin’é for di tempran”** (Proverbionan 13:24). Ta klaro kua eksperto su konseho nos mester sigui!

Sigur algun sota por ta yamá maltrato. Esei ta inaseptabel. Ma den hopi kaso, e problema NO ta e sota. **E problema ta KON ta suta!** Pesei, lo mi duna algun guia kon pa suta bo yu:

1) Mayornan ta esnan ku mester suta. Por tin kaso ku mayornan ta outorisá otro hende pa suta nan yu. Ma en general esun ku ta hasié mester ta esun ku ta stima e yu mas, mayornan.

2) Nunca suta ku rabia. Bo ta suta e yu pasobra bo ta stim’é, pa e siña obedesé. Hopi mayor ta suta pa saka sal: “Bo a pone mi kara na bèrgwensa. Ora nos yega kas, bo lo mira kuant’or tin!” Esei ta rabia, no amor. **Si no ta duel bo pa suta bo yu, bo no tin e aktitut korekto pa sut’é!**

3) Suta mes ora. Esaki ta espesialmente importante pa yunan chikitu. Si nan tin ku warda “te ora papi yega” pa haña e sota, nan no ta asosíá e sota ku e desobedensia.

4) Bai na un lugá privá. Un sota semper ta algu privá entre e yu i e mayor. Meta di e sota ta pa siña bo yu obedesé. Un sota dilanti otro hende ta solamente pone kara di bo yu na bèrgwensa.

5) Sòru ku e yu ta komprendé. Tuma tempu pa abo i e yu komprendé presis kiko el a hasi. E yu mester komprendé bon kla ku e motibu pa e sota ta pasobra el a desobedesé. “Mama a bisábo pa no hunga ku lusifer. Bo a desobedesé mama, bo a hunga ku nan tòg. Pesei mi tin ku sutábo.”

6) Usa e hèrmènt korekto. Beibel ta papia tokante un “bara”, es ta un rama òf taki fleksibel. Hopi bes mayornan ta rabia kohe kiko ku ta dal e yu kun’é, waya di koriente, sapatu, palu di basora, èts. **Esei ta maltrato...no sutamentu!** Sutamentu korekto ta eksigí disciplina di parti di mayornan. Trankil, ku kabes friu, bo ta kohe e hèrmènt apropiá pa suta e yu.

7) Suta na e pleki korekto. Tantu mayor ta lamta man dal nan yu unda ku ta—na man, den kara, na skouder. Esei ta maltrato...no un sota. Dios a diseñá hende ku un lugá sensíbel, ma tòg bon protehá, atras. Esei ta e pleki apropiá.

8) Suta pa e yu arepintí. E yu mester sinti duele...no pasobra el a haña un sota. E mester sinti duele pa su desobedesé

9) Tuma tempu pa rekonsiliashon. Despues di e sota, no laga e yu bai serka e otro mayor. Keda ku e yu, lag’é yora un ratu, konsol’é, bras’é, hasi orashon kun’é, mustér’é ku bo ta stim’é. Esaki ta un punto importante ku hopi mayor ta lubidá.

10) Lag’é rektifiká loke el a hasi malu. E mester pidi pordon di esun el a ofendé. Si el a hòrta algu, e mester hib’é bèk.

Un sota no ta e kontesta tur biaha e yu ta faya ku su mayornan. Tin otro manera tambe pa siña bo yunan dor di disciplina. Ma tin ora e manera mas mihó pa demonstrá bo stimashon pa bo yu ta dor di un sota. I esei no ta maltrato!